

〔重刊訂正本〕

中國醫學大成

錢若利題



【二十】

〔重刊訂正本〕

中國醫學大成



上海科學技術出版社

中國醫學大成 (全套共五十冊)

上海科學技術出版社出版

(上海瑞金二路四五〇號)

新華書店上海發行所發行

上海市印刷十廠印刷

開本七八七×一〇九二

三十二開

精裝

總字數二二,七九〇,〇〇〇

總印張八六二

一九九〇年六月第一版 一九九〇年六月第一次印刷

症因脈治

〔明〕秦景明 纂著

秦之楨 輯

原 編 曹炳章

總審定 裘沛然

總審閱 蕭敏材 朱邦賢 沈麗君

重刊訂正《中國醫學大成》序

《中國醫學大成》一書，我鄉先輩四明曹炳章先生所輯集，爲發揚中醫學，保存古籍，以饗同道並惠後學作也。曹氏纂集是書時，正值西學東漸，國內淺見倖進之徒，競尙浮華，大肆鞭撻我國文化固有之精英，如民族醫學，悉在消滅之列，中醫學不絕如縷。而先生乃在此時從事中醫叢書巨著之編輯，姑不論其學術價值，獨其保存民族文化精粹之苦心孤詣令人可敬，其卓識遠見，又何其可欽也。

楊志一在原書序中有說：『大凡學術之成立，歷久而不敗者，必有其真實之價值在。』善哉言乎！中華民族立國數千年而得以生存繁衍，如無優秀之文化及可貴之醫學，則亦何逃於優勝劣敗之例。尤

其在科學迅猛發展之今日，百技更新，而古老之中醫藥學日益引起國內外有識之士之重視。各類中醫藥研究所之建立，亦爲保護人民健康之需要，順應世界醫學發展之潮流而設。凡此種種，夫豈偶然。

惟中醫學歷史悠久，濫觴於炎黃，昌盛於漢唐，歷代醫家多有創見，其學術經驗載於文獻者浩如煙海，遺佚者可弗論，僅就先生纂集之時，存書尙達萬種，學者既不能盡讀，又無力購置，且諸書精粗雜糅，版本文字舛誤殊多，使學習中醫者常興望洋之嘆。先生乃爲之博採精選，上自先秦，下迄近代，凡理論、方藥、臨床各科咸備，別爲十三類，書計三百六十五種，分醫經、藥物、診斷、方劑、通治、外感病、內科、外科、婦科、兒科、針灸、醫案及外集雜著各類。其中傷科、眼科及五官病歸入外科，推拿、手術歸入針灸，醫論、醫話、醫史歸入雜著。所收各書，皆中醫要籍，大都內

容精粹，切合實用，版本亦從精選，並加句斷。各書之首，皆列著作校刊略歷及內容提要，以便讀者入門粗知梗之助。

中醫學歷來叢書頗少，是書搜羅廣而選擇精，洵爲前所未有之巨著。惜全書印刊未半而抗戰軍興，烽煙迷漫，醫籍出版被迫中輟。而已印行之一百三十六種，今亦散佚不全。上海科學技術出版社爲應學者需求，重爲付梓，並影印以存原貌。書中明顯錯訛者，由我院及中醫文獻研究所等有關單位專業人員校勘改正，使之益臻完善。

夫文以載道，中醫學爲我國醫學之重要財富，文獻則是寶庫中之重要內容。故有志斯道者，務求先通中醫之理論法則，方藥效用和臨床處置，使對中醫學有全面之理解，更須驗之臨床，以汲取其理論精華與豐富經驗。學問之事，原恃艱苦以求而非獵取可得。昔張仲景勤求古訓，博採衆方；孫思邈青衿之歲，高尚是典，白首之

年，未嘗釋卷；葉香岩以不讀破萬卷，不敢輕言醫。茲三人者，皆由勤奮好學而成一代高醫，故學習中醫宜下一番札實工夫。在此基礎上運用現代科學技術研究和整理中醫學，才有闡明和提高希望。中西醫結合，亦將另具特色。以務實精神，走中醫現代化循序而進之道路，勇於繼承，敢於創新，使傳統醫學有所發現與創造。苟能如此，不僅爲祖國爭光，並將爲人類造福。

本叢書一百三十六種，分爲五十冊；每冊後並皆附有全部書目。它的出版，爲中醫和愛好中醫者提供珍貴之醫學文獻，讀者勤習而深研之，必能奠定中醫學根柢，大有助於中醫事業之繼承與發展。

裘沛然

一九八八年六月作於
上海中醫學院

〔明〕

秦景明

纂著

秦之楨

輯

症因脈治

中國醫學大成

症因脈治提要

明秦景明纂著。景明字昌遇。雲間人。其從孫之楨。皇士編輯。康熙時。攸寧堂刊。首卷論李趙二氏及內經金匱。症因各別。治法不同。各異諦。次列各病。例言云。先聖丹溪有脈因症治之著。憑脈尋因。尋症施治。暗室摸索。後人苦無下手。是以王宇泰先生著準繩書。竟取證治列名。則有確據下手矣。然不詳述脈因二條。余又恐其脫略。今更其名曰症因脈治。則四科俱備。開卷瞭然。每一症之中。必以外感內傷各著一端。有餘不足。各分治法。臨症庶無多歧之惑。且治病先當分十二經絡。灼見何經主病。用藥可以不誤。故凡一經見症。則以一經所主之藥治之。兩經見症。則以兩經之藥合而治之。如是則孰急孰緩。從少從多。皆有主宰。有病之經。再無失治。無故之經。不妄誅伐矣。用藥之法。須尋實據之症固已。然有症脈相因。依脈用方而爲正治者。亦有症象分明。脈象模糊。難於依脈立方。而必隨症施治者。余於治法中。立此兩條。則從症從脈。自有準繩。每症章中。雖立外感內傷。誠恐學者混於施治。然亦有外感而兼內傷者。則以外感方中。加內傷藥一二味。有內傷

而兼外感者。則於內傷方中。加外感藥一二味。若二症並見者。則以二症並治。凡著十二經絡症象。不能一條詳悉者。必待互相發明。症象始著。故余著水腫症。已經分別各經絡病形。然有言之未盡者。則於後條脹症中。重言以申之。以爲兩相闡發之用。他如五臟咳嗽。五臟痿痺等症。經絡既同。則症象亦無不同。前後合參。彼此互發。相得益彰。泛視之。竟似重複。實則反覆發明諸經形證。今之治病不明經絡者。通忽此法耳。云。按皇士纂輯是編。症分內外。因亦分內外。脈分虛實。治分經絡。對症用藥。無游移多歧之惑。施宇瞻因謂秦曰。是書爲壽世之寶也。與其實之一方。不若廣之天下。與其利諸目前。不若傳之後世。爲是書以利濟一方。爰爲是刻。以公諸天下可乎。及門皆大歡喜。惟施君之言。與有力矣。此秦公著書行世之微旨也。

原序

醫有五科。曰脈、曰因、曰病、曰症、曰治。丹溪先生以病症爲一。故以四字該之。纂成一帙。名曰脈因症治。實爲壽世之書。奈後代諸賢。不業是作。遂至散亡淹沒。予所深惜。然諦思之。仍有難於空行者。蓋執脈尋因尋症。一時殊費揣摩。不若以症爲首。然後尋因之所起。脈之何象。治之何宜。則病無遁情。而藥亦不至於誤用也。是以古人先重望聞問。而獨後於切耳。余不諒。敢竊丹溪之餘語。彙成一卷。改名症因脈治。先辨其症。次明其因。再切其脈。據症據因。據脈用治。庶節節可證。而法不謬施。諒必無罪於後世也。但年邁神衰。恐多疵漏。未敢授梓傳世。待後之賢者。詳定而行可也。

崇禎辛巳嘉平月淡香堂廣野道人秦景明序

症因脈治原序

沈序

秦子皇士。好學多材藝。自幼博通經史。及長名重士林。惜不得志以有爲。古之人進則救民。退則修己。爲秦子者。獨善其身可矣。然而秦子濟人利物之心。不甘自棄。謂無其位而可行其志者。惟有醫。於是取岐黃之要。潛心三十年。而其道甚明。遂行於世。全活者無算。不論富貴貧賤。終日孜孜。惟以救人爲事。而不計利。其術工而專。奇而正。固一時之彥也。而秦子思以海內之大。後世之久。非一身之所能及。必求其可大可久。能以遍於天下。傳之將來。然後乃可。發其祖景明先生所傳之秘。曰症因脈治者。復窮搜博覽。闡明而損益之。以行於世。俾行是道者。因症按脈而脈不虛索。因脈用藥而藥不妄投。其有功於世。不大且久乎。向以不得有爲。爲秦子惜。今則爲秦子慶矣。假使秦子者得一官效一職。不過安全一鄉一邑而止。其能起四海九州萬億千載之老少強弱。悉保合太和。以安全於熙皞之天哉。癸未冬。予以疾告歸。其書適成。會施君宇瞻及昆季葆文。紋石象三諸公者。善發一家欲躋斯民於仁壽之域。捐資將授梓。予不禁撫掌而爲之序。時

症因脈治 沈序

二

康熙四十三年端陽後十日賜進士現任翰林編修同郡沈宗敬書於醉花處

查敘

秦子皇士者。上海人也。少時慨然有利濟天下之志。遂研精醫學。而於古今方書。無不通徹。要以黃帝神農造命宗旨爲指歸。其臨症必力窮其症之本末。與夫輕重緩急。推之至微。嘗曰。我非欲精於醫也。惟期內省不疚而已。斯真仁人君子之用心者。於是聲稱籍甚。海昌去海邑。相距不啻四百里。而名聲習聞。如比屋然。非實大者而能如是耶。余向也奔走四方。深以不得面承請教爲悵。自壬午冬。膺特簡日侍內廷。蓋益絕遠當世之士云。然秦子者。實益大。聲益洪。四方賢士大夫聞風遠迎者。日益衆。乙酉春赴嘉禾之請。接臨敝邑。起沈疴者不計算。名益貫盈於耳。因念古者學成名立。必手定一書。以公於世。今以秦子之學如是。之名如是。使無所傳以公於世。古之利濟天下者不如是。至季冬。單升陳子來入春闈。會家人持方書數卷。名曰症因脈治。約五六百帙。進閱之。乃秦子皇士之所著也。分門別類。無不本末兼舉。輕重緩急之得宜。直令讀者據其書。自無不至於神。而臻於化。人人皆可造命者。既而宇瞻及仲季諸公。捐金鐫刻。以公世用。固請序於余。以弁

症因脈治 查敘

二

其簡端。余不禁躍然大喜。以爲秦子於利濟天下之志。庶幾能垂無窮矣。施諸君光被天下後世之功。且與余公於世之意有合也。遂書而爲之序。康熙乙酉除夕。賜進士出身現任翰林院編修通家弟查慎行書。